

Avon in decenni levàn ins schenghegiar la claustra ed ussa vender ella

Avon 10 onns han ins dau a Glion il teater «Ina claustra da schenghegiar» sin iniziativa dallas claustras dominicanas svizras. El center steva la fundaziun dilg Uorden dominican avon 800 onns. Ussa tuna ei cuntrariamein e dil tuttatfatg realisticamein: La claustra dominicana da Glion duei vegnir vendida, mo ch'in cumprader ei buca da cattar. Aschia scriva la consora *Ingrid Grave*, enconuschenta neu dalla televisiun, en il Fegl parochial grischun da quest meins.

Dapresent vivan en claustra a Glion 60 soras ella vegliadetgna media dad 85 onns. Els onns 1960/70, ch'ins era vidlunder dad ereger la nova claustra a Glion, fuva ei aunc biebein 500 soras. Ei vegn pia buc ad esser pusseivel da mantener il grond e modern complex claustral persunalmein e finanziamein. E tuttina resta il fervent giavisch dallas dominicanas da Glion da passentar la veta en lur claustra.

Schizun la ETH s'occupescha davart la sort

Sco quei che la cuminonza dominicana da Glion scriva en sia novissima brev circulara, s'occupescha schizun la Scola politecnica federala Turitg (ETH) intensivamein cun igl avegnir dalla claustra da Glion. En il rom d'il project «Zukunft Kloster Ilanz» sefatschentan ver 40 students e studentas dil departament architettura intensivamein cun igl avegnir dil monasteri da Glion.

Entochen la fin da matg sortan da lur studis da projects models, contribuziuns filmicas che fan resultar ideas per la claustra e sias cussadentas. Era tegnan els quen ord optica dalla tgira da monuments ed aspects social-cultural. Las soras da Glion ein fetg spanegiadas tgei plans futuristics che giuvens carstgauns proponan per la claustra. Planisau eis ei era per la stad ina exposiziun cun lavurs ord la claustra. Ins vegn

a rapportar en cuort sur dallas lavurs proponidas dalla renomada scola a Turitg.

La claustra duei restar in center spiritual

Schidadir parallel vegn arranschau en ed entuorn la claustra ina entira retscha da cuors e seminaris che dattan era ina investa tgei immensa lavur che las soras da Glion han prestau en Surselva, el Grischun, en Svizra ed ellas missiuns duront 160 onns da lur existenza. Mintgacass eis ei la finamira dallas soras da mantener la baselgia e la claustra sco center spiritual per il contuorn. Mo ei resta aunc bia da far e sliagar. E la purschida generala dalla Claustra ei aunc adina considerabla e la veta religiosa fluranta. Per saldo eis ei la finala ina sperdita generala immensa.